

ДЭЭРГИ-БУРГАНГА МӨРГҮЛДЕР НОМУ





ДЭЭРГИ-БУРГАНГА МӨРГҮЛДЕР НОМУ

Тыва дылче *Валерия Кулундарий, Алдынай Ондар, Спартак Оюн*
орус болгаш англи дылдардан очулдурган

Виталий Войнов чыып тургускан

© В. Кулундарий, А. Ондар, С. Оюн, очулга, 2013

© В. Войнов, чыып тургусканы, 2013





Дээрде Адавыс

Дээрде Адавыс!

Сээң адың алдаржызын!

Сээң Чагыргаң чедип келзин.

Дээрге дег, черге база Сээң күзел-соруун чогуп бүтсүн.

Амыдыраар хлеб-тараавысты биске бөгүн хайырла.

Биске өрелиг улусту өршээгенивис дег,

өре-ширевисти база биске өршээ.

Бисти күткүлгеге алыспас кылып көр,

ол ышкаш бузуттугдан бисти адырып көр.

Чүгө дээрге чагырга, күчү-күш база алдар

Сеңээ кезээ мөңгедө хамааржыр-дыр.

Аминь.

Иисус Христос (Чаа Чагыг-керээ)





Үнүп ораp хүннүн дугайында мөргүл

Дээрги Бурган, үнүп ораp хүн менээ кандыг-даа болуушкуннар эккелзе, шуптузун сеткилимде оожургалдыг хүлээп аар аргадан менээ берип көр. Сээң ыдыктыг күзел-соруунга долузу-биле бердиниптер харыктан менээ хайырла. Бо хүннүн кайы-даа шагында мени деткип, шупту талазы-биле өөредип, сургап көр.

Бо хүннүн дургузунда кандыг-даа медээлер алзымза, бүгү болуп турар чүүлдер Сээң күзел-соруун айы-биле болуп турар деп быжыг бүзүрел-биле оларны оожургалдыг хүлээп аар кылдыр мени өөредип көр. Шупту ажил-херээмни, аксы-сөзүмнү, бодалдарымны база миниишкиннеримни Сен удуртуп көрөм. Кижиниң манаавааны болуушкуннар таварышса, ол шупту Сээң холундан деп чүүлдү кажан-даа утпас кылдыр менээ сагындырып чор.

Өг-бүлемниң кежигүннерин, төрелдеримни, даргаларымны, ха-дунмаларымны база чагырткан ажилдакчыларымны кайызындаа эпчоксундуруп, муңгаратпайн, оларның шуптузу-биле дорт болгаш шын аргыжып билир кылдыр мени өөредип көрөм. Ынчалза-даа буюнныг чүүлдү база чурумну камгалап чоруур арыг-шынчы туружумну кажан-даа салбас кылдыр мени өөредип көр.

Дээрги-Чаяакчы, үнүп ораp хүнде могап-шылаарымны база шупту-ла болуп эртер болуушкуннарны ажып эртер күштен менээ берип көр. Мээң күзел-соруумну удуртуп, мени мөргүлдеп, бүзүрөп, идегеп, шыдажып, өршээп билир база кижилерге ынак болур кылдыр өөредип көр.

Аминь.

Оптин чурттуг ирейлерниң мөргүлү





Эргенги мөргүл

Адазы, Оглу база Ыдыктыг Сүлдениң ады-биле. Аминь.

Дээрде саадаан Адам, ынак Оглуң Иисус Христостун ачызында эрткен дүне каржы-бактан, айыыл-халаптан мени камгалааның дээш четтиргеним илередип тур мен. Бо хүн база мени хай-бачыттан, каржы-бактан камгалаарыңны дилеп тур мен. Шупту ажыл-херээм, амыдыралым Сээң сеткилиңге тааржыр болзун, Бурганым.

Сагыш-сеткилимни-даа, мага-бодумну-даа, шупту бар чүвемни Сээң холуңга хүлээдип тур мен. Каржы-бак дайзын меңээ күш четпези-биле Сээң ыдыктыг төлээң мээң-биле кады чорзун.

Аминь.

Мартин Лютер (1483–1546)



Эргенги мөргүл

Уйгу-дыжымдан оттуп келгеш, Сеңээ четтиргеним илередип олур мен, Дээргим. Бодуннун чаагай сеткилиц-биле бачыттыг чалгаа менче килеңневейн, мени үр шыдажып, мени бүгү-ле багым-биле узуткап кагбааның дээш, Сеңээ четтиргеним илередип олур мен. Кижиды-амытанга өскерилбес ынак чоруун дээш, идегел чок кээп ушкаш чыткан мени бут кырынга көдүргениң дээш Сеңээ четтиргеним илередип олур мен. Сени алдаржыдып, Сээң өршээлиңни мактаар харыкты бергениң дээш Сеңээ четтирерим ол.

Ам бо хүнде мээң угаан-медерелимни чырыдып, аксым ажыдып берип көрөм, Сээң сөстериңге өөренип ап, Сээң чагыгларыңны шингээдип алып кылдыр, Сээң күзел-сорууну күүседип, Сеңээ чүрээмниң ханызыңдан ырлап, ыдыктыг адың алдаржыдып чоруур аргадан берип көрөм. Адазы, Оглу база Ыдыктыг Сүлдениң ады бөгүн, үргүлчү, кезээ мөңгөдө-ле алдаржызын!

Аминь.



Православ христианнарның мөргүлү

Кежээки мөргүл

Дээрги-Бурганывыс, кээргээчел, энерелдиг болгаш, мени бо хүн аксы-сөзүм, ажил-херээм, бодал-сеткилим-биле кылыпкан бачыттарым дээш кезетпейн, өршээ. Мени каржы-бактан камгалаар Бодуннун хайгааракчы төлээңни тургузуп, дамчыктыг удуурумну хайырлаарыңны дилеп тур мен. Чүгө дээрге бистиң мага-бодувустуң-даа, сагыш-сеткиливистиң-даа Камгалакчызы Сен сен, Бурганым. Адазы Сени, Оглуңу база Ыдыктыг Сүлдени алдаржыдып, мактап тур бис бо шақта, кезээ мөңгөдө.

Аминь.

Православ христианнарның мөргүлү





Чуртталгамны аайлап берип көрөм

Дээрги Христос, бо делегейже бачыттыгларны камгалаар дээш келген Бурган Адазының Сөзү!

Сээң кээргээчел сеткилинден дилеп ор мен, мээң чуртталгамны эдип, аайлап берип көрөм. Ажыл-херээм буянныг боор кылдыр, хай-бачытче чүткүлүмнү ап каап, Сеңээ анчыг чүүлдерни-даа, меңээ хоралыг чүүлдерни-даа менден ырадып көрөм, а Сеңээ тааржыр-даа, меңээ ажыктыг-даа Сээң билириң эки чүүлдерден меңээ хайырлап көр.

Арыг эвес үреден төрүттүнген чүвени кым арыглап шыдаарыл? Чүгле чаңгыс Сен шыдаар сен, Күчү-Күштүг Бурганым, чаагай сеткилин кажан-даа өскерилбес, буруулугларга агартышкын хайырлаар, бачыттары дээш өлгеннерни диргизер, бузуттугларны моон соңгаар кажан-даа бак чорук кылбас кылдыр өскертип шыдаар Бурган. Сеңээ анчыг чүүлдү менден адырып көр. Мээң кадыкшылым-даа, харык чогуум-даа Сеңээ илден, кадыымны камгалап, харык-шинектен меңээ берип көрөм. Дээрги Бурганым, мени эмнеп көр, ынчан камгалаттырар мен, мени камгалазыңза, камгалалды алыр мен.

Хипподан келген Августин (354-430)



Сагыш-сеткилим, бодалдарым Сеңээ хүлээдип тур мен

Бүзүрээр-даа болзумза,
Дээргим, Сен мээң бүзүрелим быжыктыр.
Ынанып чоруур-даа болзумза,
Дээргим, Сен мээң идегелим быжыктыр.
Мен Сеңээ хандыкшаан-даа болзумза,
Дээргим, Сен мээң ынакшылымның одун-көзүн кыпсып,
арыгла.
Бачыттарым дээш качыгдап чорзумза-даа,
Бурганым, буруумну ам-даа миннип чорууйн.

Чаяакчым Сени бодап, тейлеп, кыйгырып тур мен.
Бодуннуң мерген угааның-биле мени башкарып,
быжыктырып, камгала, Бурганым.
Сагыш-сеткилим, бодалдарым Сеңээ хүлээдип тур мен,
шуптузу Сенден үнүп турзун.
Ажыл-херээм Сээң күзел-сорууң-биле болзун.
Угаан-медерелим чырыдып, күзел-соруум быжыктырып,
мага-бодумну, сагыш-сеткилимни арыгла, Бурганым.
Бодумда билииргек, адыыргак чорукту,
бачыттарымны тиилээр күштен бер, Бурганым.
Бүгү назынымда Сени алгап чорууйн, Бурганым.

Аминь.

Александр Мень (1935–1990)

Ишти-хөңнүм Сээң-биле чырып кээр

Хүннүң болгаш дүңнүң Бурганы!

Мээң ишти-хөңнүм – караңгылай-даа берзе,
Сээң-биле чырып кээр,
Мен чааскаанзырай-даа берзимзе,
Сен мени кагбас сен,
Мен – кошкак мен,
а Сен меңээ дузалажып чедип кээр сен,
Мен – дүвүрээчел мен,
а Сен – мээң амыр-дыжым сен,
Мен – далаш мен,
а Сен – хемчээли чок шыдамык чоруктуң Бурганы сен,
Мен будалгаштың аза бердим,
ынчалза-даа Сээң мерген угааның мөңгө болганда,
мээң оруумну Сен ам дораан болгаш кажан кезээде
башкарып чор.

Аминь.

Дитрик Бонхоффер (1906 – 1945)

Буян сеткилди дилээри

Дээрги Бурганым,
мени буян сеткилге өөредиринни диледим.
Сээң кижилерге буян хайырлап чорааның дег чүректи
меңээ база бээринни диледим.
Орнунга чүве алыр мен деп манавайн,
а ёзулуг-ла сеткилим-биле улустарга берип чорууйн,
Бурганым.
Сээң даалгаң – буян кылып үлежиринче
мээң караам ажыдарыңны диледим, Бурганым.

Аминь.

Билдинмес автор



Бурганның сеткилинге тааржыр чүрек

Амы-тынымның Ээзи, Дээргим!

Ундаралдан, чалгаа чоруктан, эрге-дужаалзырак чоруктан,
хоозун-аас эдеринден мени камгала.

Мерген-угаан, чөпшүл сеткил,
шыдамык туруш, кижилерге ынак чүректен
Сээң чалчаң меңээ берем.

Дээрги Хааным, өскелерни шиидер эвес,
а бодумнуң бачыттарым миннир чүректи
хайырлап көрөм, Бурганым.

Кезээ-мөңгедө, кажан-даа Сеңээ алдар-мактал болзун!

Аминь.

Сирия чурттуг Эфрем (306–373)

Чүрээвисти диргизип көр



О, эргим Иисус, Сээң ачында амыдырап чор бис,
Сен чогуңда өлүг бис.

Бо делегейниң хоозун хей-бузунче чүткүвезивис-биле
Бодуннуң ыдыктыг ынакшылың-биле чүрээвисти
диргизериңни диледивис.

Бистиң бачыттарывыс дээш өлгөш,
бисти агартып арыглаар дээш өлүглер аразындан дирлип
үнгөн Бурганывыс,
бистиң чүрээвисти Сеңээ хандыкшыл-биле долдуруп көрөм.

Аминь.

Джон Уэсли (1703–1791)



Чөпшүл, биче сеткил дилээрининч мөргүлү


Дээрги-Чаяакчы, мени өршээ! Христос, мени өршээ!
Чөпшүл, биче сеткилдиг Иисус, мени өршээ!
Дээрде Ада, Бурганывыс, бисти өршээ!
Делегейни бачыгтардан арыглаан Иисус, бисти өршээ!
Ыдыктыг Сүлде, Бурганывыс, бисти өршээ!

Хомудал көрбейн амыдыраксаар сеткилден
мени чайладып камгала, Иисус!
Чүгле мээнии-биле болзун дээр күзелден
мени чайладып камгала, Иисус!
Чүгле мээң арга-сүмем-биле болзун дээр сеткилден
мени чайладып камгала, Иисус!
Мактадыксаар сеткилден мени чайладып камгала, Иисус!

Алдар-хүндү күзээр сеткилден
мени чайладып камгала, Иисус!
Кезээде бир дугаар болуксаар күзелден
мени чайладып камгала, Иисус!
Шупту улус менээ ынак болзун дээр күзелден
мени чайладып камгала, Иисус!

Мени-даа уттуптазын дээр коргуушкундан
чайладып камгала, Иисус!
Мени-даа каразы бербезин дээр коргуушкундан
чайладып камгала, Иисус!
Чуртталгам-на алдар-хүндү чок эрте бербезин дээр коргуушкундан
чайладып камгала, Иисус!

Мени-даа өскээр билиптезин дээр коргуушкундан
чайладып камгала, Иисус!
Менден-даа ойталай бербезин дээр коргуушкундан
чайладып камгала, Иисус!



Мени-даа нүгүлдей бербезин дээр коргуушкундан
чайладып камгала, Иисус!

Мени-даа дора көрө бербезин дээр коргуушкундан
чайладып камгала, Иисус!

Мени-даа кочулап, кыжыра бербезин дээр коргуушкундан
чайладып камгала, Иисус!

Менден артык бир-ле кижини үнелеп турар болза,
ынакшыл-биле ажып эртер күштен берип, дузала, Иисус!

Мени эскербейн, өске кижилерни хүлээп турар болза,
ынакшыл-биле ажып эртер күштен берип, дузала, Иисус!

Мени аткаарладып, өске кижини удуртулгаже салып турар болза,
ынакшыл-биле ажып эртер күштен берип, дузала, Иисус!

Мени эвес, өске кижини чөптүг-шынчы деп санап турар болза,
ынакшыл-биле ажып эртер күштен берип, дузала, Иисус!

Менден артык бир өске кижиге улус ынак болза,
ынакшыл-биле ажып эртер күштен берип, дузала, Иисус!


Бедик эрге-дужаалче чүткүвезим-биле, меңээ чөпшүл,
биче сеткилдиг ынакшылдан авыралдап көр, Иисус!



Кылыксанчыг эвес күүседир ужурлуг ажыл-херээмни
Сээң алдарың дээш өөрүшкүлүг күүседир чөпшүл,
биче сеткилдиг ынакшылдан авыралдап көр, Иисус!

Улугларның айтыышкынында, Сээң күзел-сорууң күүседир
чөпшүл, биче сеткилдиг ынакшылдан авыралдап көр,
Иисус!

Чүгле аксым-биле эвес, ажыл-херээм-биле
мени хомудаткан кижини өршээр чөпшүл, биче сеткилдиг
ынакшылдан авыралдап көр, Иисус!

Кижини бүрүзүңге, ылаңгыя мени хоптажып турар кижилерге
ынакшыл-биле кичээнгейлиг хамаарылганы көргүзөр
чөпшүл, биче сеткилдиг ынакшылдан авыралдап көр,
Иисус!





Дораан буруумну миннип, хараадаар чөпшүл,
биче сеткилдиг ынакшылдан авыралдап көр, Иисус!
Түрөңги човулаңныг байдалды хүлээп шыдаар чөпшүл,
биче сеткилдиг ынакшылдан авыралдап көр, Иисус!

Делегейниң бачыттары дээш кеземчени Бодунче алган
Бурганның Хураганы, Дээргивис, бисти өршээ!
Делегейниң бачыттары дээш кеземчени Бодунче алган
Бурганның Хураганы, Дээргивис, бисти дыңна!
Делегейниң бачыттары дээш кеземчени Бодунче алган
Бурганның Хураганы, Дээргивис, бисти кээрге!

Чөпшүл, биче сеткилдиг, Иисус, мээң дилээм дыңнап,
Бодуннуң энерелиң меңээ берем.
Мээң өөрүшкүм Сээң алдар биле ынакшылын болур кылдыр
меңээ ат-алдарже чүткүвес сеткилди бээриңни диледим.

Аминь.

Александр Мень (1935–1990)



Чуртгалгага ылап-ла херектиг чүүл дугайында мөргүл




Кажан мен бодум аштап турумда,
меңээ аштаан кижиден чоргузуп,
ону чемгерип каар аргадан меңээ берип көр,
суксап турумда суксаан кижиден чоргузуп көр,
оон суксунун хандырар аргадан меңээ берип көр.

Мен дона берзимзе,
донуп турар кижиден менче чоргузуп,
ону чылыглап-чылдыптар аргадан берип көр.


Муңгаразымза,
муңгараан кижиден чоргузуп көр,
ону аргалап-часкарар харыктан берип көр.



Кажан мээң чүктээн чүьгүм аар апарза,
а мен ону ууп чадап, дузалакчы хереглей бээримге,
чанымда дузалапкы дег кижичок болза,
ынчан Сен мээң чүьгүм чиигедип берип көр.
Мен дег ынакшылга төлөптиг кижиден менче чоргузуп,
ол кижиге бараан болуп, дузалаптар аргадан
меңээ берип көр.

Үе-шак хереглежимзе,
кандыг-бир кижиге дузалажып,
аңаа кичээнгейден салыр аргадан меңээ берип көр.
А кажан мээң чүрээм саймаарап, аартап келирге,
хүлүмзүртүп-өөртүптерим хире кижиден
менче чоргузуп көр.



Кажан мен дидиреп, корга берзимзе,
мээң мактапкы, хей-аъдын көдүрүпкү дег кижиден
меңээ чоргузуп көр.





Кажан меңээ деткимче херек апарза,
кымны мен бодум деткип болур-дур мен,
ындыг кижиден меңээ айтып берип көр,
а кажан меңээ улустуң сагыш-човаашкыны херек апарза,
мээң сагыш-човаашкынымны хереглеп чоруур кижиден
айтып берип көр.

Кажан мен чүгле бодумну бодап чурттай берзимзе,
мээң бодалдарымны өске кижилерже угландырып көр.

Билдинмес автор (Тереза аваныы деп санал бар)

Караам биле кулаамны ажыдып көр

Дээрги-Чаяакчы, улуска херек чүүлдерни эскерип чоруур кылдыр
мээң караамны ажыдып көр,
оларның кыйгызын дыңнап шыдаар кылдыр
кулаамны ажыдып көр,
кижилерге дузалаар сеткилдиг болур кылдыр
чүрээмни ажыдып көр.

Кошкактарны күштүглерниң-даа килеңинден,
ядыбыларны байларның-даа килеңинден
камгалаарындан кортпас болуйн.

Ынакшыл, идегел болгаш бүзүрелди
кайда хереглеп турарын көргүзүп көр,
ынаар оларны мени дамчыштыр чедирип көр.

Үнүп орар хүнде амыр-чыргалдың херектерин
Сен дээш кылып шыдаар кылдыр
мээң караам биле кулаамны ажыдып көр.

Алан Стюарт Пэйтон (1903–1988)



Өскелерни куду көөр чаңчылдан мээң чүрээмни арыгла

Дээрги Бурган, Дээрде Адавыс, Сеңээ мээң ынакшылымны билир сен. Иисустун ады-биле дилеп ор мен: бир эвес мен Сеңээ ынак болзумза, чоок улузумга база чанымда кижилерге база ынак болур ужурлуг мен деп чүүлдү шингээдип алыр аргадан менээ берип көрөм.

Мени долганган делегейниң улузу ядыы кижилерге, өске-сөөк чоннарга хөңнү чок тур. Ынчалза-даа Сен, Бурганывыс, бисти кижилерни ылгай көрбес кылдыр өөредип чоруур сен. Бодумну өрү көрдүнер, өскелерни куду көөр чаңчылдан мээң чүрээмни арыглап, шупту кижилерге чымчак сеткилдиг болгаш буянныг чүректиг болур кылдыр мени өскерттип көр.

Мени килеңнээчел эвес кылып, өскелерге ээлдек боорунга менээ дузалап көрөм. Кымга мээң ынакшылым херектиг бол, кандыг-даа улус болза, ылгап шиливейн оларга ынак боорунга менээ дузалап көр. Бо делегейде шупту кижилерни чаңгыс ханныг кылдыр Сен чаяган сен деп чүүлдү билип алыр харыктан менээ берип көр. База бүзүрэн кижини бүрүзү өлбезин, харын мөңгө амыдыралдыг болзун дээш Сен Бодунун эр чаңгыс Оглуңну бистиң делегейивисче айбылап чоргускан сен деп шынны шингээдип алыр аргадан менээ берип көр. Бир эвес мен кымны-даа бол ажыг сөглөп азы бак чаңнай берзимзе, менээ шаптыктап, мени орталандырып көр, Бурганым, чүгө дизе Сен кижини бүрүзүнге ынак болгаш, Сээң Оглуң, Камгалакчывыс, шуптувус дээш өлүмнү хүлээп алган болгай.

Оожум-тайбың, найыралдыг, эки тура-биле кожа чурттаар кылдыр, чөпшүл болгаш эвилең-ээлдек, ынакшылдыг аажы-чаңчыл шупту чоннар аразыңга делгереп, таразын.

Иисустун ады-биле мөргүлдөп ор мен. Аминь.

Лютеран христианнар мөргүлү



Бүзүрэннер ниитилелиниң мөргүлү



Дээрживис, Иисус Христос! «Мээң адымны хүндүлээр дээш ийи азы үш кижича чыгырыл, Мен база аңаа турар мен» деп биске чугаалаан сен.



Кижилер бо чуртталгада чааскаанзыргай чорзун деп Сенде ындыг күзел чок. Бисти чаңгыс өг-бүле болзун дээш Сен бисти чыып алган сен. Сен биске кайы хире ынак сен, бистер база бот-боттарывыска ынчаар ынак болур деп Сээң чаа чагыыңны күүседир аргадан берип көр.

Бисти шыдамык болуп, бодувусту чагырып шыдаар аргадан берип көр. Сен, Дээрде Адаң база Ыдыктыг Сүлде ышкаш чаңгыс бот болур кылдыр, бисти база шупту тудуш, чаңгыс аай болурувусту Сээң чагыың, мөргүлүң аайы-биле хайырлап көр.

Бо дүмбей караңгы делегейге Сенден келген чырык бисти таварыштыр чырып чоруур болзун. Ынчан кижилер Бурган Аданың ынакшылын таварыштыр, Оглунуң хайырлаан камгалалын база Ыдыктыг Сүлдениң киржилгези-биле Сээң ынакшылыңны билип алыр болзун.

Аминь.

Александр Мень (1935–1990)



Хоорайывыс дээш мөргүл

Дээрги Бурганывыс, Сен – корум-чурумнун, чөптүг чоруктуң Бурганы сен. Кажан кижилер Сээң күзел-соруунга дүүштүр башкарып база аңаа чагыртып чоруурга, ындыг чорук Сенээ таарымчалыг. Иисус Христостуң ады-биле Сенден бистиң хоорайывысты база ооң чурттакчыларын алгап-йөрээрини дилеп тур мен. Хоорайывысты удуртуп турар улуска чагыг-сумен берип көрөм. Олар кижилер бүрүзүңгө кичээнгейлиг болзуннар. Берге айтырыглар шиитпирлээринге оларга мерген-угаандан, арыг-шынчы сеткилден, кижилерге ынак болгаш оларга бараан болур күзелден, база чурттакчы чоннуң байдалын угаап билир сеткилден берип көр.

Бистиң хоорайывысты айыыл-халап, хилинчектен, аарыг-аржыктан камгалап-ла көрөм. Янзы-бүрү күткүлделерден бисти ырадып көр, ындыг күткүлделер бистиң удуртукчуларывысты бачытче киирбезин, оларның хайында улус-чон Чагырыкчывыс Сени дора көрбезин.

Сенээ ынак улуска белеткеп тургусканың мөңгө хоорайынче бистиң чонувус оруун тып алыр кылдыр, күрүневиске Сээң Буянныг Медээң үргүлчү нептереп дынналып турзун.

Аминь.

Лютеран христианнар мөргүлү



Кожалар-биле эптиг найыралдыг амыдырал дилээри

Дээрги-Чаяакчы, шыдавазы чок амыр-тайбыңның Бурганы! Бүгү чоннар-аймактарның төөгүзүн-даа, кызыгаарларын-даа Бодунуң мерген угааны, алыс-шынчызы, ынакшылы-биле тургускан Бурганывыс! Тейлеп тур бис: янзы-бүрү сөөк чоннарның көрүшпес, билишпес чүүлдерин соксадырыңны, кижилериниң аразыңга тайбыңдан бээрини дилеп тур бис.

Делегейде кижини бүрүзү Сээң ынакшылың-биле чаяттынган төлдериң болгай бис, а Сээң ынак Оглуң шуптувуска Бодунуң өртек чок үнелиг ханын төпкеш, авыралдыг Сээң-биле эптежиپ алыр арга дугайында Буянның Медээни хайырлаан.

Кижини бүрүзүңге амыр-тайбың, Сээң-биле эптежип алыр авыралдан хайырла, Бурганывыс. Хүнден хүнче кожаларывыс-биле эптиг найыралдыг амыдыралды бээрини дилеп тур бис. Бисти бачыттарывыстан адырып бергениң дээш өөрүшкүден берип көр, Дээргивис.

Чонувусту чөптүг-төлөптиг, хоойлу-дүрүм сагып чоруур, арын-нүүрүңге чагыртып чоруур, ажыл-херээвис-биле, амыдыралывыс-биле Сени болгаш Сээң Оглуңну база Ыдыктыг Сүлдени алдаржыдып чоруур болурувус дээш мөргүп тур бис.

Аминь.

Лютеран христианнарның мөргүлү





Бойдус дээш өөрүп четтиргени

Эң-не бедик, шыдавазы чок, авыралдыг Дээргивис, Сенээ алдар, мактал, хүндүткел база алгаг-йөрөөл болзунам! Чүгле Сен төлөптиг сен, өндүр бедик Бурганым, а кижиг амытан Сээң адын безин адаарынга төлөптиг эвес!

Макталдыг Сен, мээң Дээргим, бүгү-ле чаяалган таварыштыр – бир-ле дугаарында бисти чырыткан хайырааты акывыс болур аяс хүнүн дээш, чүгө дизе ол кайгамчык чараш, ооң чырыгы биске Сени сагындырып чоруур демдээң-дир, өндүр бедик Бурган!


Макталдыг Сен, мээң Дээргим, дээрде Сээң чаяп кааның чайыннаан эртинелер дээш – угбавыс чырык айың база сылдыстарың дээш.



Макталдыг Сен, мээң Дээргим, төрелдеривис салгын-хат база агаар дээш, булуттар база бүгү бойдузувус дээш – оларны таварыштыр Сен бүгү чаяп алган амы-тынныгларыңга чемишти берип турар сен.

Макталдыг Сен, мээң Дээргим, дунмавыс боор суг дээш – ол арыг база чөпшүлдүг-даа болза, өртээ биле ажыы аажок улуг.

Макталдыг Сен, мээң Дээргим, дүмбей дүннү чырыдыштар акывыс болган одуң-көзүң дээш – ол боду кайгамчык, чаагай болгаш күштүг.

Макталдыг Сен, мээң Дээргим, бистиң иевис болган черивис дээш – ол бисти углап-баштап, янзы-бүрү чараш чечектиг чимис-үнүжү-биле бисти ашкарып-чемгерип чор.





Макталдыг Сен, мээң Дээргим, Сеңээ ынак болгаш, өскелерни өршээп билир улус таварыштыр. База аарыг-аржык, бергелерни ажып эртип турар улус таварыштыр алдаржы-ла, мээң Дээргим. Бергелерни оожум шыдамык эртип турар улус амыр-чыргалдыг – оларның баштарынга ыдыктыг оваадайны Бодун кедирер сен, Эң-не бедик Бурганым.

Макталдыг Сен, мээң Дээргим, бистиң угбавыс боор өлүмнү таварыштыр-даа – ооң куспаандан кандыг-даа өлүр тынныг кижиниң мага-боду дезип шыдавас. Бужар бачыттыг хевээр өлгеннер ат болур, а Сээң ыдыктыг күзелинни күүседип турганнар амыр-чыргалдыг. Ийиги өлүм оларны таварып шыдавас.

Мээң Дээргимни мактап, алдаржыдып йөрээнер, четтиргениңер илередип, Анаа чөпшүлдүү-биле бараан болуңар!

Ассизиден келген Франциск (1181–1226)

Бодун бодаар чорук дугайында

Чүгле бодум бодап чурттаар, ботка ынак чоруктан мени хостап-ла көр, Бурганым.

Мен бодум эвес, а Христос чүрээмге чурттаар болзун.



Мээң бачыттыг күзелдерим

чаңгызы-даа артпас кылдыр узуткап көр!

Бүгү-ле амыдыралымда чүгле Сени дилеп, Сенче чүткүп, көрүжүм чүгле Сенче угланган чорзун!

Аминь.

Джон Уэсли (1703–1791)





Өг-бүлелиг улустун мөргүлү

Дээрги Бурганым! Бо каржы, чааскаанзырал долган өртемчейге Сен меңээ эң-не эргим кижиге дужар салым-чолду хайырлааның дээш, бис ийини чоошулаштырып, чаңгыс мага-бот кылдыр кылганың дээш улуу-биле четтирдим!

Бистиң өг-бүлевистиң аас-кежиин кадагалап, чүгле ботка ынак чоруктан, каразыгдан, чылдагаан чок хүнээшкинден камгалап көрөм! Бот-бодувусту өршээп, биеэги хомудалдарны утгуп, моон соңгаар оларны сагынмас күштен берип көрөм. Авыастыг, кара сагыштыг улусту бистиң ыдыктыг эвилеливистен ырадып көр, кандыг-даа өске кижиге бис ийиниң аравысче киржип, чарып шыдавас болзун!

Ажы-төлүвүс ынакшылдыг, дыннангыр, аас-кежиктиг, өөрүшкүлүг өзер болзун. Бисти өлүм хүнүнге дээр чарылбайн кады-кожа чоруур кылдыр доңнап-ла көр. Бот-бодувусту карактап азыражыыр эргеленчиг күзелден биске берип көр. Бистиң ынакшылывысты Дээрниң ыдык чаъзы-биле суггарып, ол улам-на күштелип, мөңгө амыдыралче ханы дазылданып өзер кылдыр йөрээп көрөм!

Аминь.

Билдинмес автор

Аарыг төл дугайында

Дээрги, бүгү чүвениң амы-тынының, күчү-күжүнүң Хандырыкчызы! Чаш назынында аарыгга алыскан бо чаш төлче холуңну сунуп көр, Бурганывыс! Мага-боду күш кирип, доругуп өзүп келгеш, амыдыралы-биле, арыг шынчы буянныг ажыл-херектери-биле Сеңээ бараан болзун.

Аминь.

Католик христианнарның мөргүлү



Ажы-төлүвүс дээш мөргүл

Дээргивис Иисус! Сээң баарында кандыг болдур бис, ол-ла ояар келдивис. Хай-бачыдывыс миннип тур бис, бисти өршээп-ле көр! Сеңээ бүрүнү-биле бодувусту бердинип, Сени Чагырыкчывыс, Бурганывыс, Камгалакчывыс кылдыр хүлээп ап тур бис. Бисти база өг-бүлевисти эмнеп-экиртип көр, мага-бодувусту, угаан-медереливисти, сагыш-сеткиливисти быжыглап көр. Ада-ие хүлээлгевисти, Сээң чагаан сөзүң ояар күүседир аргадан биске берип, ажы-төлүвүстү Сеңээ шынчы болур кылдыр өөредип көрөм. Бис Сеңээ ынак болгаш, ачы-дузаң дээш четтиргенивисти илередип тур бис. Ада-ие кижиниң чүрээ дилеп турда, Сен ону харыы, дуза чок черле кагбас сен. Бүгү-ле чуртталгавыста бис Сээң орууң изеп чурттаар бис.

Аминь.

Пятидесятник христианнар мөргүлү

Аваларның ажы-төлү дээш мөргүлү

Дээргивис Иисус, бистер, сеткиливис дүвүрөп чоруур авалар, Сеңээ кээп, ажы-төлүвүс дээш мөргүлдөп турувуста, шуптувусту камгалап, Бодуңнун үнези чок арыг ханың-биле бисти аштап-чуп көр. Ынчан кандыг-даа бак-халап бисче, бажың-балгадывысче халдавас.

Ынакшылывыс Иисус! Сээң көрүжүң бистиң чүректеривистиң ханызынче дорт көрүп, ында чүү аарып чоруурун көрүп турар. Сеңээ төлдеривисти хүлээдип бээр дээш келдивис. Сени оларга бистен-даа артык күштүг ынак деп билир бис. Бистиң өг-бүлевисти эрлик болгаш ооң аза-четкеринден, оон-даа өске айыыл-халаптан камгалап көр. Сени бакты тиилээн деп билир болгаш, бистиң чанывыска кезээде чорууруң дээш четтиргенивис илередип тур бис.

Аминь.

Билдинмес автор



Христостун өөреникчилери болуулу

Иисус Христос!

Биске Дээрде Адавысты көргүскен Бурганның Оглу,
Сээң өөреникчилериң болуулу.

Бистиң сагыш-сеткиливиске оожургалды бээринни аазаан сен,
ынчалза-даа чалгаа чалчалар Сеңээ херек чок.

Сергек хайгааракчыларың болур күштен берем.
Сеңээ, чүгле Сеңээ, бердинген болуулу.

Шупту чүвени Сеңээ дээш күүседиривисти өөредиринни
диледивис, Сээң ажы-төлүн болуулу.

Сээң күзел-сорууң, чагыгларың күүседир күштен бээринни
диледивис.

Улуска ачы-буян чедирерин биске өөрөт.

Фарисейлерниң ажыткызындан бисти камгала.

Биске чүгле кол чүүлдерни көөрүн өөрөт.

Бачыгтан, чалгаа чоруктан, кандай сеткилден бисти адырып,
дузала.

Делегейде бүгү чымчак-сеткилдиг, чараш чүве
биске Сени сагындырып чорзун.



Делегейниң каржы-бак чүүлдери
биске серемчилел сагындырыг болзун.

Бузуттуг кижилерниң чижээнден
бодувустуң бачытгарывыстың көрүнчүүн көрүп чоруулу.

Сагыш бодалы, чүдүлгези бистен ылгалып турар кижилерге-даа,
бүзүрел чок кижилерге-даа эки хамаарылгалыг болур
кылдыр бисти өөрөт, Бурганым.

Амыдыралдың кысказын бодап ажылдаарынче,
Сеңээ бараан болурунче далажырын биске сагындыр.

Өршээп билир, кижилерге ынак, билир болур кылдыр
бисти өөрөт, Бурганым.



Кандыг-даа байдалда үргүлчү Сеңээ мөргүп-тейлеп
амыдырап чоруур кылдыр бисти өөрөт, Бурганым.
Сээң эрге-чагыргаңның амдан эгелээш хамаатылары болур кылдыр
бисти өөрөт, Бурганым.
Бачыттыг кижини эвес, а чүгле ооң бачыдын
көөр хөңнү чок болурувусту өөрөт.
Сээң дугайында улуска херечилээр күштен берем.
Хоозун сеткилден бисти камгала, Бурганым.
Чуртталгавыстың эгези биле төнчүзү болуп көрөм,
ам-даа, кезээ-мөңгөде-даа.

Александр Мень (1935–1990)

Ажыл-херээвистиң түңнели дугайында мөргүл

Сээң биске ажыглалга берген хөй-ле эт-сеп, херектиг
чүүлдер дээш четтирдим, Бурганым. Мээң өнчү-хөреңгим
өскелерге дузалыг болзун, ол меңээ кажан-даа өреже кирбес
аргадан бээр болзун.

Дээргивис, чаагай сеткилиц-биле бистиң ажыл-херээвистиң
түңнелин, ажы-төлүвүстү алгап-йөрөөп, шаг-үевисти, харык-
күжүвүстү, черивистиң дүжүдүн көвүдөдип берип көр.

Пятидесятник христианнар мөргүлү

Биске ыдыктыг холдарың-биле дээп көр

Кежи аарыг кижиге безин дээринден ческинмээн ыдыктыг Холдар,
мээң балыгланган чүрээмге дээп көрүңер.

Согур кижиниң караан эмнээн Холдар,
мээң саргып чоруур сагыш-сеткилимни эмнеп көрүңер.

Аскак кижини бут кырынга тургузуп сегиткен Холдар,
мээң үзүк-чазык чуртталгамны септеп-селип көрүңер.

Бүгү-ле амыдырал-чуртталганы бөле-хаара тудуп чоруур Холдар,
мени Бодунарның оожургалыңарга оораап куспактаңар.

Дээргим, биске ыдыктыг холдарың-биле дээп, эмнеп,
өршээп, сегидип-ле көр.

Бо дээрге мээң Сеңээ мөргүлүм-дүр, мээң Дээргим.

Бүгү-ле өөрүшкүмнү база ажыг-шүжүүмнү
чииги-биле чүктеп шыдаар күштен меңээ берип көрөм.

Бурганым Сеңээ база улус-чонга бараан болурумга
мээң ынакшылым дүжүттүг болгаш үре-түңнелдиг болур
арганы меңээ берип көрөм.

Кажан-даа ядыылардан хая көрүнмес,
турамык балдырлыгларның мурнунга дискек базып
сөгүрбес күштен меңээ берип көрөм.

Хүн-бүрүде төнмес-батпас дүвүрелдерден
угаан-медерелимни хостуг кылып,
арыгланып чоруур күштен меңээ берип көрөм.

Сээң күзел-соруунга бодумнуң күжүмнү
эки турам-биле база ынакшылдыг дүжүп бээр аргадан
меңээ берип көрөм.

Рабиндранат Тагор (1861-1941)




Кайнаар бар чыдарымны бодум безин билбес-тир мен

Мээң Дээрги Бурганым, мен кайнаар бар чыдарымны бодум безин билбес-тир мен. Мурнумда орук-даа көзүлбейн тур. Мээң оруум каяа төне бээрин билип шыдавас мен. Ол ышкаш, бодум бодумну безин эчизинге дээр эки билбес кижидир мен. Сээң күзелиң аайы-биле чоруп олур мен деп бодаарымга-даа ол шынында ыңдыг деп чүүлге дүүшпейн барып болур.

Ынчалза-даа Сени өөртүксээн күзелим шынап-ла Сени өөртүп турар деп бүзүрээр мен. Ындыг күзел мээң кылып турар бүгү ажил-херээмде бар деп база идегеп тур мен. Ындыг күзел чокта кажан-даа чүнү-даа кылбас мен деп база идегеп тур мен. Бир эвес мен бо ёзугаар чурттап турар болзумза, Сен мени шынның оруу-биле, бодум ону билбээнимде-даа, эдерти бээр сен деп бүзүрөп чор мен.

Ынчангаш мен Сенээ үргүлчү бүзүрөп, идегеп чоруур-дур мен, чеже-даа өлүмнүң кара хөлөгезинге аза берген ышкаш менээ сагындырза-даа. Мен кортпас мен, чүгө дизе Сен кезээде мээң-биле кады сен, мени кажан-даа бергелерниң мурнунга чааскаандырзын кагбас сен.

Томас Мертон (1915 – 1968)



**Сен бачыттарымны Бодунга чүктеп алдың
(Хилинчектиг пятницаны таварыштыр)**

Бачыттыглар дээш өлгөн Бурганның Хураганы!



Бо хүн Сээң белдир-ыяжыңның эдээнче келдим. Бүгү-ле арын-нүүрүм биле чөпшүл чүрээм ханызындан миннип тур мен – Сен мээң ажыг-шүжүүм, муңгаралым алгаш бардың. Бүгү делегейниң шаажылалын Сен чааскаан Бодунга чүктедиң, Сээң балыгларың мени эмнеп кагды. Каржы кеземчени мээң орнумга хүлээп алганың дээш улуу-биле четтирдим. Мээң бачыттарым дээш кайы хире аар өртек төлээниңни ам-на көрүп тур мен – ол хай-бачыт дээш Сен амы-тыныңдан чарылдың.

Бурганның Хураганы, чаңгыс катап Бодунну өргүп салгаш, Сенээ бүзүрөөннер бистер шуптувусту арыг болгаш шупту талазындан дески кылдыр өскертипкен сен. Сээң белдир-ыяшка өлүмүң үргүлчү өршээлдиң, оожургалдың, өөрүшкүнүң, тайбынның үнер дөзү болзун.

Мээң мөргүлүмнү дыңнап көрөм, Дээрги Иисус.

Аминь.

Лютеран христианнар мөргүлү



Катап дирилген Дээргивиске (Пасха байырлалын таварыштыр)

Дээрги Иисус, катап дирилгеш, мөңгеде амыдыраан Камгалакчывыс!

Меңээ камгалалды бээр дээш өлүмнү хүлээгеш, катап дирлип келген сен – мээң сеткил-чүрээмге идегелди берип, өлүмден коргуушкунну алгаш бардың. Ол дээш Сени алдаржыдып мактап тур мен!

Дээргим, Сээң белдир-ыяшка өлүмүнүнү камгалалдыг күжүңге бүзүрээр улус шииткелче барбас деп чугаалаан сен, Дээргим. Сээң аазаан сөзүң бо Пасха хүнүндө качыгдап муңгараан кижилерге оожургалды берзин. Кажан-бир шагда бис шупту ынак чоок кижилеривис-биле ыдык дээрлерге дужуп катчы бээр бис деп манаашкынның өөрүшкүзү бистиң сеткиливисти чырыдып чорзун.

Бо хүн мен өөрүп тур мен, чүге дизе Сеңээ бүзүрөөннер тиилелгениң оруун, Сээң күчү-күштүг холундан дузаны албышаан ам-даа уламчылап турар. Караңгы тамының күжү Сеңээ бүзүрөөннерни базып шыдавас. Мен бодумну бүрүнү-биле Сеңээ бараан боор кылдыр тураскаадыксап тур мен. Мээң чүрээм Ээзи болуп, хай-бачыдымны менден ырадып, чигзинишкиннерим чазыктырып, дүвүрээшкіннерни менден ойладып көр.

Сээң Сүлдең мээң чүрээмге мөңгеде өшпес ынакшылдан кыпсып-ла берзинем. Хүнден хүнче Сээң мени аппарат чыдар орууңну изээр күзелимни күштелдирип көрөм, ол орук Сээң ыдыктыг Дүжүлгениң баарыңга келир хүнүмге чедир үзүлбезин. Ынчан мен катап дирилген Бурганның чайынналчак чырыын көрүп, ыдыктыглар база дээрниң төлээлери-биле Сээң мөңгө ханы ынакшылыңны алгап-йөрээп мактаар мен.

Аллилуйя. Аминь.

Лютеран христианныр мөргүлү

Амыр-тайбың нептередир херекселиң болуйн

Дээрги-Чаяакчы, мени Бодуңнуң амыр-тайбың нептередир херекселиң кылдыр кылып көрөм.

Кижилер бот-боттарындан хөңнү калып көрүшпестээн черинге мен ынакшылдың үрезин чажып тарыйын,

Хомудал бар черге — өршээлди,

Чигзиниг бар черге — бүзүрелди,

Идегелин ышканган черге — чаа ынанышты,

Дүмбей караңгы черге — чырыкты,

Качыгдал бар черге — өөрүшкүнү нептередийн.

Кудай-дээрниң Ээзи!

Мээң сеткилимде мындыг чүткүлдү чаяп көрөм:

Улус мени аргалазын деп манавайн,

харын өскелерге аргалал болуйн,

Улус мени шын билип алзын деп негевейн,

харын оларны мен бодум билип ап чорууйн,

Кижилер меңээ ынак болзун деп күзевейн,

харын бодум шуптуга ынак болуйн.

Өскелерге берип турзувусса,

бодувуска ол эглип кээп турар болгай,

Өршээп турар болзувусса,

бодувустуң хай-бачыдывыс өршээттинер,

Өлзүвүссе-даа,

мөңгө амыдыралче төрүттүнүп турарывыс ол.

Аминь.

Билдинмес автор

(Ассизиден келген Францискини деп санал бар)



Бурганның мөргүлге харыылары

Улуургак, билииргек чоруумну аппаарын Бургандан дилээримге –
улуургак чоруктан кижги боду ойталаар ужурлуун
харыылаан.

Чыдар аарыг уруумну эмнээрин дилээримге –
ооң сагыш-сеткилиниң быжыын,
а мага-боттуң дөмей-ле өлүр ужурлуун харыылаан.



Шыдамык турушту хайырлаарын дилээримге, Бурган меңээ –
шыдамык туруш шенелделерниң түңнелинде көстүрүн,
ону чедип алыр ужурлуун харыылаан.



Аас-кежикти дилээримге, Бурган меңээ –
авыралды берип турарын,
а аас-кежиктиг болур-болбазы –
кижиниң бодундан хамааржырын харыылаан.

Хилинчектен камгалаарын дилээримге, Бурган меңээ –
аарышкылыг байдалдар кижини делегейниң хоозун
сагыш-човаазындан хая көрүндүрүп,
Бурганче чоокшуладырын харыылаан.

Сагыш-бодалымны өстүрерин дилээримге, Бурган меңээ –
сагыш-бодалын кижги боду бедидер ужурлуун
харыылаан.

Бурганым меңээ кандыг кичээнгейлиг ынагыл,
мен база кижилерге ындыг ынак болуксаарымны
дилээримге, Ол меңээ –
АМ-НА чүнү дилээр ужурлуг мен деп
билгенимни харыылады.





Мени быжыктырар шылгалдалар дилээримге,
Бурган меңээ оларны берген.
Мерген-угаанны дилээримге,
Бурган меңээ шиитпирлээр бергелерни берген.
Эрес-дидим чүрек дилээримге,
Бурган меңээ айыылдыг байдалды берген.
Ынакшылды дилээримге,
Бурган менче мээң дузам хереглээн түрегдээннерни
чоргузупкан.

Күзээнимден чүнү-даа албаан мен,
ынчалза-даа меңээ ЫЛАП-ЛА ХЕРЕК турганын
шуптузун алган мен.

Ийе, Бурган мээң мөргүлдери дыңнаан.

Билдинмес автор (Тереза аваныы деп санал бар)



ДОПЧУЗУ

Дээрде Адавыс	2
Үнүп оран хүннүң дугайында мөргүл	3
Эртенги мөргүл (лютеран христианнарны)	4
Эртенги мөргүл (православ христианнарны)	5
Кежээки мөргүл	5
Чуртталгамны аайлап берип көрөм	6
Сагыш-сеткилим, бодалдарым Сеңээ хүлээдип тур мен	7
Ишти-хөңнүм Сээң-биле чырып кээр	8
Буян сеткилди дилээри	8
Бурганның сеткилинге тааржыр чүрек	9
Чүрээвисти диргизип көр	9
Чөпшүл, биче сеткил дилээриниң мөргүлү	10
Чуртталгага ылап-ла херектиг чүүл дугайында мөргүл	13
Караам биле кулаамны ажыдып көр	14
Өскелерни куду көөр чаңчылдан мээң чүрээмни арыгла	15
Бүзүрөөннер ниитилелиниң мөргүлү	16
Хоорайывыс дээш мөргүл	17

Кожалар-биле эптиг найыралдыг амыдырал дилээри	18
Бойдус дээш өөрүп четтиргени	19
Бодун бодаар чорук дугайында	20
Өг-бүлелиг улустуң мөргүлү	21
Аарыг төл дугайында	21
Ажы-төлүвүс дээш мөргүл	22
Аваларның ажы-төлү дээш мөргүлү	22
Христостуң өөреникчилери болуулу	23
Ажыл-херээвистиң түңнели дугайында мөргүл	24
Биске ыдыктыг холдарың-биле дээп көр	25
Кайнаар бар чыдарымны бодум безин билбес-тир мен	26
Сен бачыттарымны Бодуңга чүктеп алдың (Хилинчектиг пятницаны таварыштыр)	27
Катап дирилген Дээргивиске (Пасха байырлалын таварыштыр)	28
Амыр-тайбың нептередир херекселиң болуйн	29
Бурганның мөргүлге харыылары	30